

四庫全書

史部

欽定四庫全書

史部

欽定續文獻通考卷二百四十五
六

主事臣陳若霖覆校

總校官內閣中書臣孫溶

欽定四庫全書

欽定續文獻通考卷一百四十五

四裔考

西南夷

廣西土司一

明太祖洪武二年廣西諸蠻平

中書省言廣西諸峒雖平宜遷其人入內地可無邊

患帝曰溪洞蠻獠雜處其人不知禮義順之則服逆

之則變不可輕動惟以兵分守要害以鎮服之俾日漸教化數年後可為良民何必遷耶

明史土司傳曰廣西徭獠居多盤萬嶺之中當三江之險六十三山倚為巢穴三十六源踞其腹心其散布於桂林柳州慶遠平樂諸郡者所在蔓衍而田州泗城之屬尤稱强悍種類滋繁莫可枚舉蠻勢之衆與滇為埒今就其尤著者列於篇觀其叛服不常沿革殊致可以覘中國之德威知夷情

之順逆為籌邊者之一助云

臣等謹按明史廣西土司凡三十有二今以一統志考之類皆府治而府之所領者惟慶遠土司三南寧土州二太平土州十八土縣二土司一思恩土州一土縣一土司九鎮安土州四而已

桂林

元世祖至元十四年置廣南西路宣撫司於靜江

時廣西二十四郡並已內附從湖廣行中書省議置

宣撫司詔崔斌阿里海牙同駐其地十五年立靜江路總管府泰定帝泰定二年靜江義寧縣蠻徭為寇勅守將捕之致和元年靜江徭寇靈川臨桂二縣命廣西招捕之

臣等謹按明史土司傳云桂林自秦置郡漢始安唐桂州天寶改建陵宋靜江府元靜江路明初改桂林府為廣西布政使司治所屬內地不當列於土司然廣西惟桂林與平樂潯州梧州未設土官

而無地無猺獞桂林之古田平樂之府江潯州之
藤峽梧州之岑溪皆煩大征而後克卒不能草薶
而獸獮之設防置戍世世為患是亦不得而略焉
明太祖洪武初改靜江路為桂林府

七年永道桂陽諸州蠻竊發官軍討平之二十二年
富川縣逃吏首賜糾合苗賊盤大孝為亂往來劫掠
廣西都指揮韓觀遣官禽殺大孝等因言靈亭鄉乃
猺蠻出入地宜以桂林等衛羸餘軍士置千戶所鎮

之詔從其請二十七年全州灌陽等縣平川諸源徭民聚衆為亂命湖廣廣西二都司發兵討之諸徭竄

遁置灌陽守禦千戶所

初灌陽縣隸湖廣因廣西平川等三十六源徭賊作亂攻

擊縣治詔寶慶衛指揮孫宗討平之灌陽去湖廣遠隸廣西近遂以灌陽隸桂林令領兵築城守之

永樂二年總兵韓觀奏潯桂柳三郡蠻寇黃田等累行劫掠殺擄人畜已調兵追勦斬獲頗多尋蒙遣官齎敕撫安其黃田等徭皆已向化悉歸所擄人畜帝命觀復業者善撫恤之

宣宗宣德六年命廣西土官衙門詞訟就所近衛理之
從都督山雲奏謂廣西左右兩江設土官衙門大小
四十九處蠻性無常讐殺不絕朝廷每命臣同巡按
御史三司官理斷緣諸處皆瘴鄉兼有蠱毒三年之
間遣官往彼死者凡十七人事竟不完今同衆議奏
除土官衙門軍務重事外不必徑詣其處報可

景帝景泰五年廣西古丁等洞賊首劫掠南寧上林武
緣諸處詔官軍勦捕之

初桂林古田獐種甚繁最强者曰韋曰閉曰白而皆并於韋賊首韋朝威據古田縣官竄會城遣典史入縣撫諭烹食之自後弘治間大征殺副總兵等官正德初再征殺通判知縣指揮等官迨嘉靖初又征之殺指揮等官韋銀豹與其從父朝猛攻陷洛容縣據古田分其地為上下六里銀豹出掠挾下六里人行而上六里不與焉四十五年提督吳桂芳因其間遣官入上六里撫諭之諸獐復業者二千人銀豹勢孤

請降久之復猖獗嘗挾其五子據鳳皇連水二寨襲
昭平殺知縣更自永福入桂林劫布政使庫殺署事
叅政鮑城而去官軍追不及久之臨桂永福各縣兵
羣起捕賊始得賊黨扶嫩土婆顯等三十餘人於各
山寨中時首惡猶未獲

穆宗隆慶三年官軍禽賊章朝猛等古田平

時朝議以廣西專設巡撫推江西按察使殷正茂為
僉都御史以往正茂至奏請勦賊合土漢兵十萬集

衆議時八寨助逆衆議先勦勅書亦有先平八寨徐
圖古田之語正茂獨不謂然先給榜諭八寨八寨聽
命然後分兵七哨以總兵俞大猷統之使副總兵門
崇文等各領一哨復分土兵為二隊更番清道必先
清數里而後行及至其巢合營攻之斬七千四百六
十餘級生禽朝猛梟於軍俘獲男女千餘口銀豹窮
蹙擇肖己者斬首獻捷聞既而生縛銀豹并其子扶
枝膠送京師斬之乃并八寨與龍哈哖咳為十寨立

長官司以黃昌等為長官及土舍聽守禦調度更升
古田縣為永寧州

神宗萬厯六年嶺表平

先是既設永寧州而永寧獍韋狼要與其黨黃銀成
有隙相仇殺常安巡檢欲窮治之狼要遂與右江荔
浦山灣諸獍稱亂命指揮徐民瞻將兵捕之民瞻伏
兵執狼要諸獍大誑總制殷正茂巡撫郭應聘乃檄
徵田州向武都康諸土兵屬叅將王瑞進勦斬廖金

經廖金蓋韋銀花韋狼化等至是總制凌雲翼巡撫
吳文華大征河池哱咳諸徭斬首四萬八百餘級嶺
表悉平

柳州

元世祖至元十三年置柳州安撫司

柳州置自唐貞觀中宋以馬平縣為柳州治度宗時
移柳州治於柳城縣以馬平為屬至是置安撫司十
六年改柳州路總管府領縣三曰柳城曰馬平曰洛

容

仁宗延祐三年融賓柳州徭蠻叛命湖廣行省遣官督
兵捕之

泰定帝泰定二年柳州馬平縣徭為寇湖廣行省督
所屬追捕之

明太祖洪武初移柳州治於馬平

自唐改龍城郡又改柳州至是仍移於馬平所屬州
二縣十內屬千餘年惟上林縣尚為土官而賓象融

羅諸猺蠻蟠結為寇城外五里即賊巢軍民至無地
可田後屢加征勸置土巡檢於各峒隘稍稱寧焉

成祖永樂七年柳州蠻作亂

時道村寨蠻韋布黨等及廣西洞蠻韋父融州羅城
洞蠻潘父恣各聚衆為亂柳州等衛官軍捕斬之九
年賓州遷江縣象州武仙縣古達等洞蠻獠作亂詔
發柳州南寧桂林等衛兵討之十四年融州猺民作
亂官軍討平之十九年融縣蠻賊羣聚剽掠廣西叅

政耿文彬率民兵會桂林衛指揮平之宣德初蠻寇
覃公旺作亂據思恩縣大小富龍三十餘峒以拒官
軍總兵顧興祖等督兵分道攻之斬公旺并其黨千
五十餘人捷至帝曰蠻民亦朕赤子殺至千數豈無
脇從非辜者以後宜開示恩信撫慰而降之如賈琮
戍交州可也二年廣西三司奏柳慶等府賊首韋萬
黃韋朝傳等聚衆劫殺為害敕興祖進兵勦平之

明史土司傳曰懷縣為柳州屬邑在右江上游旁

近靖綏黎平諸徭竊據久隆慶時大征古田懷遠
知縣馬希武欲乘間築城召諸徭役之許搞不與
諸徭遂合繩坡頭板江諸峒殺官吏反總制殷正
茂請於朝遣官統兵進討至板江徭賊皆據險死
守正茂知諸徭獨畏永順鉤刀手及狼兵乃檄三
道兵數萬人擊太平河裏諸村連拔數寨斬賊首
榮才富吳金田等前後捕斬俘獲男婦及牛馬無
算事聞議設兵防改萬石宜良丹陽為土巡司屯

土兵五百人且耕且守

神宗萬厯元年洛容獐蠻作亂

時知縣以養歸主簿謝漳行縣事會上元夜單騎巡
徼山中獐蠻韋朝義率上油古底諸獐夜半出掠殺
漳奪縣印去是夜指揮朱昌允土巡檢韋顯忠共提
兵決戰斬首三十一級獲朝義奪還縣印守巡官以
聞乃命總兵李錫等勦之破上油古底諸寨斬覃金
狼等二千八百三十餘級俘二百二十餘人牛馬器

械稱是後殘獍黃朝貴復合融縣徭號萬人聲言欲入富福鎮叅將王世科復引兵擊斬之始洛容在萬山中城小無一雉堞縣官皆寓府城知縣余涵請遷城於白龍巖不果至是謝漳遂及於難

明史土司傳曰有韋王朋者馬平獍也初平馬平時因建營堡使土舍韋志隆提兵屯其地王朋視堡兵如仇常率東歐大產諸蠻要挾營堡兵備周浩使千總往撫遂殺千總劫村落總兵王尚父勸

平之

慶遠

東蘭州
等附

元成宗大德元年立慶元南丹溪洞等處軍民安撫司
慶遠秦象郡漢交趾日南二郡界後淪於蠻唐始置
粵州天寶初改龍水郡屬嶺南道乾符中更宜州宋
升慶遠軍節度咸淳初改慶遠府至元十三年置安
撫司十六年改慶元路總管府至是中書省言南丹
州與慶遠路相去為近所隸戶少請省之遂併南丹

立安撫司泰定帝泰定元年慶遠徭首潘父絹等率
衆來降署為簿尉等官有差二年慶遠蠻徭為寇敕
守將捕之

明太祖洪武元年改慶遠路為府

二年行省臣言慶遠府地接八番溪洞所轄南丹宜
山等處宋元皆用其土酋安撫使統之天兵下廣西
安撫使莫天護首來款附宜如宋元制錄用以統其
民則蠻情易服守兵可減詔改慶遠府為慶遠南丹

軍民安撫司以天護為同知三年行省又言慶遠故府也今為安撫司其地皆深山曠野其民皆安撫莫天護之族素庸弱宗族强者動肆跋扈至殺河池縣丞與諸蠻相煽為亂乞罷安撫司仍設府置衛以守其地報可二十八年蠻地悉定詔置南丹奉議慶遠三衛以官軍守之

宣宗宣德五年總兵官山雲討慶遠蠻寇平之

九年雲奏思恩縣蠻賊覃公若等累年作亂今委官

率兵勦捕斬賊首梁公成潘通天等仍督官軍搜捕
餘黨帝賜敕慰勞又奏慶遠鬱林等州縣蠻寇出沒
必宜勦除而兵力不足帝命廣東都司調附近衛所
精銳士卒千五百人委都指揮一員赴廣西聽雲調
用

明史土司傳曰正統四年莫禎

南丹土官

奏本府所轄

東蘭等三州土官所治歷年以來地方寧靖宜山
等六縣流官所治溪峒諸蠻不時出沒原其所自

皆因流官能撫字附近良民而溪峒諸蠻恃險為
惡者不能鈐制其出沒每調軍勦捕各縣居民與
諸蠻結納者先漏洩軍情致賊潛遁及聞招撫詐
為向順仍肆劫掠是以兵連禍結無寧歲願授臣
本州土官知府流官總理府事而臣專備蠻賊務
禽捕殄絕積年為害者其餘則編伍造冊使聽調
用據巖險者拘集平地使無所恃擇有名望者立
為頭目加意撫恤督勵生理各村寨皆置社學使

漸風化三五十里設一堡使土兵守備凡有寇亂
即率衆勦殺如賊不除地方不靖乞究臣誑罔之
罪帝即敕總兵柳溥曰以蠻攻蠻古有成說今莫
頑所奏意甚可嘉彼果能効力省我邊費朝廷豈
惜一官爾其酌之

孝宗弘治九年命於土民中選補長官司

時總督鄧廷瓚言廣西猺獞數多土民數少兼各衛
軍士十亡八九凡有征調全倚土兵乞令東蘭土知

州韋祖鉉子一人領土兵數千於古田蘭麻等處撥
田耕守候平古田改設長官司以授之廷議以古田
密邇省治其間地土多良民世業若以祖鉉子為土
官恐數年之後良民田稅皆非我有欲設長官司祇
宜於土民中選補廷瓚又言慶遠府天河縣舊十八
里後漸為獍賊所據止餘殘民八里請分設一長官
司治之部議增設永安長官司授土人韋萬妙等為
正副長官并流官吏目一員是年裁忻城縣流官留

土官知縣掌縣事亦從廷瓚奏也十二年韋祖鉉率兵五千助思恩岑濬攻田州殺男女八百餘人驅之溺水者無算副總兵歐磐詣田州兵乃解

明史土司傳曰東蘭州在府城西南四百二十里宋時有韋君朝者居丈蘭峒為蠻長傳子宴開崇寧五年內附因置蘭州以宴開知州事俾世其官元改為東蘭州韋氏世襲如故洪武十二年土官韋富撓遣家人韋錢保詣闕上元所授印錢保匿

富撓名以己名上因以錢保知東蘭州既而錢保徵斂暴急民不堪命擁富撓作亂廣西都司討平之執錢保正其罪仍以其地歸韋氏

又曰那地州在府城西南二百四十里宋熙寧初土人羅世念來降授世職崇寧五年諸蠻納土遂置他那二州以羅氏世知地州大觀中析地置孚州元仍為他那二州洪武元年土官羅黃貌歸附詔并那入地為那地州予印授黃貌世襲土知州

以流官吏目佐之

又曰南丹州宋開寶初土官莫洪騰內附元豐三年置南丹州管轄諸蠻歷世承襲元至正末莫國麒納土命為慶遠南丹谿洞安撫司明洪武初安撫使莫天護歸附七年置州授莫金知州世襲佐以流官吏目金以叛誅廢州置衛後因其地多瘴遷之賓州既而蠻民作亂復置土官知州以金子莫祿為之

又曰忻城宋慶厯間置縣隸宜州元以土官莫保
為八仙屯千戶洪武初設流官知縣罷管兵官籍
其屯兵為民莫氏遂徙居忻城界宣正後徭獍狂
悖知縣蘇寬不任職徭老韋公泰等舉莫保之孫
誠敬為土官寬為請於上官具奏得世襲知縣由
是邑有二令權不相統流官握空印僦居府城而
已弘治間總督鄧廷瓚奏革流官土人韋保為內
官陰主之始獨任土官

又曰永順司永安司舊為宜山縣正統六年因蠻民弗靖有司莫能控禦者民黃祖記與思思土官岑瑛交結欲割地歸之思思因謀於知縣朱斌備時瑛方雄兩江大將多右之斌備亦欲藉以自固遂為具奏以地改屬思思土民不服韋萬秀以復地為名因倡亂成化二十二年覃召管等復亂屢征不靖弘治元年委官撫之衆願取前地別立長官司都御史鄧廷瓚為奏置永順永安二司各設

長官一副長官一以鄧文茂等四人為之皆宜山
洛口洛東諸里人也自是宜山東南棄一百八十
四村地宜山西南棄一百二十四村地議者以忻
城自唐宋內屬已二百餘年一旦舉而棄之於蠻
為失策云

平樂

元成宗大德五年升昭州為平樂府

初唐以平樂縣置樂州復改昭州宋因之至是改為

府地界桂梧西北近楚清湘九嶷鬱相繆結東南入
梧溪洞林箐多為徭人盤據先是元貞二年廣西賊
陳飛雷通藍青謝發寇昭梧藤容等州湖廣左丞巴
特瑪琳沁擊平之至是升為府

明太祖洪武二十一年平樂洞徭肆擾所司請勦之
廣西都指揮使言平樂府富川縣靈亭山破紙山等
洞徭二千餘人占耕內地嘯聚劫奪居民被擾恭城
賀縣及湖廣道州永明等縣之民亦被害比調衛兵

收捕即逃匿巖谷兵退復肆跳梁請於秋成時統所部會永道諸軍列屯賊境扼其要路收其所種穀粟彼無糧食勢必自窮乘機禽戮可絕後患從之

穆宗隆慶六年府江諸獍平

府江有兩岸三洞諸獍皆屬荔浦延袤千餘里中間巢洞盤絡為獍獍窟穴江上諸賊倚為黨援日與府江酋長楊公滿等掠荔浦平樂及峰門南源執永安知州殺指揮千戶土舍及兵民無算而遷江之北三

來賓之北五皆右江獍亦時與東歐西里及三都五
都諸賊相倚附馬多人勁俗號為剗馬賊常陳兵走
嶺東掠三水清遠諸縣還入南寧平南武宣來賓藤
貴劫府庫已而劫來賓所千戶黃元舉殺土吏黃勝
及其子四人兵七十餘人又殺明經諸生王朝經周
松李茂姜集等白晝劫殺道絕行人是年巡撫郭應
聘總督殷正茂請討詔督軍進勦并調東蘭龍英泗
城南丹歸順諸土兵而以土吏韋文明等統之攻古

西巖口笋山古造及兩峰黃洞等寨斬獲賊渠餘黨
竄入仙回古帶諸山搜捕殆盡乃移檄北三北五趣
其歸降峒老韋法真同被擄來賓邇江民蒙演等詣
軍前乞降許之乃定善後六策以聞

神宗萬厯六年北山蠻復倡亂官軍討平之

北山蠻譚公柄挾毒弩傷行旅每出十百為羣自殺
黃勝後復聚黨以三千人出公鳳山龜鼈塘與河塘
韋宋武傍江結寨時義寧永寧永福諸獍羣起相殺

掠道路不通會呌咳寨藍公潺執土吏黃如金奪其
司巡撫吳文華檄守巡道吳善陳俊徵永順白山兵
及狼兵勸之橫山呌咳諸巢諸徭請還侵地及所擄
生口願輸賦為良民遂班師

明史土司傳曰右江十寨隆慶中總督殷正茂擊
破古田即以檄趣八寨歸降得貸死於是寨老樊
公懸韋公良等踵軍門上謁自言十寨共一百二
十八村環村而居者二千一百二十餘家皆請受

賦右江兵備鄭一龍叅將王世科謂十寨既請為
氓當以十家為率賦米一石村立一甲長寨立一
峒老為徵賦計而以思古周安落紅古卯龍哈立
一州屬向武土官黃九疇羅墨古鉢古憑都北哖
咳立一州屬那地土官黃暘皆為土知州已移思
恩守備於周安堡而布政使以為不便總制乃議
立八寨為長官司以兵八千人屬黃暘為長官黃
昌韋富皆給冠帶為土舍亦各引二百守焉久之

十寨復聚黨作亂據民田產白晝入都市剽掠甚至攻城劫庫戕官民總制劉堯誨巡撫張任急統兵進勦斬首一萬六千九百有奇獲器械三千二百牛馬二百三十九帝乃升賞諸土吏功復分八寨為三鎮各建一城而以東蘭州韋應鯤韋顯能及田州黃馮克為土巡檢留兵一千人戍之於三里增建二堡自楊渡水為界墾田屯種給南丹衛通道慶遠賓州使思恩三里聯絡不絕於是右江

十寨復安輯輸賦

三十二年守臣討桂林平樂徭獍以捷聞

桂林平樂徭獍據險肆亂殺知縣焚劫無虛月總督
應檟檄總兵顧寰督兵進勦禽斬俘獲男女牛馬器
械甚衆平樂徭人自數經大征後刊山通道展為周
行而又增置樓船繕修校壘居民行旅皆帖席徭獍
亦駮駮馴習於文治矣

梧州

元世祖至元十四年置梧州安撫司

梧州漢蒼梧郡唐為梧州宋因之至是置安撫司十六年改梧州路總管府十一月以梧州妖民吳法受扇惑藤州德慶府瀧水徭蠻為亂獲其父誅之泰定帝泰定四年梧州蠻為寇湖廣行省督兵捕之

明太祖洪武元年梧州土官降

時征南將軍廖永忠等既平廣東引兵至梧州境元達嚕噶齊拜珠率官吏父老迎降叅將朱亮祖駐兵

藤州於是潯貴等州縣以次降附

明史土司傳曰明代廣西全省惟蒼梧一道無土
司徭患亦稀萬厯初岑溪有潘積善者僭號平天
王與六十三山六山七山諸徭獍據山為寇居民
請勦會大兵征羅旁不暇及總制凌雲翼檄以禍
福積善願歸降輸賦乃貸其死且以其子入學議
者謂七山為蒼藤信地六山為容縣北流中衝北
科為六十三山咽喉懷集為賀縣諸村出入之所

因立五大營營六百人合得三千人設叅將及屯堡三十治焉而懷集徭賊在正德中已雄據十五寨環二百餘里為州縣患官軍屢討之歸降然盤互如故往往相結諸峒蠻劫掠殺百戶及把總村民畏之東西走匿都御史吳善檄總兵戚繼光徵兵於羅定泗城都康諸土司分五道命將擊金雞松柏諸寨斬渠魁撫四百餘人時鬱林徭亦桀驁數糾諸生徭破諸村寨入寇興業縣兵巡道副使

王原相告於總制調兵擊破之諸徭悉平

潯州

元世祖至元十三年置潯州安撫司

潯州江曰潯江東城門曰潯陽唐天寶初改郡名取
馬乾元初復為潯州宋省尋復置至是置安撫司十
六年改為總管府

明國子監生封登奏畧曰潯州夾江諸山崿岬巖
業峽中有大藤如斗延亘兩崖勢如徒杠蠻衆蟻

沒號大藤峽最險惡地亦最高登藤峽巔數百里
皆歷歷目前軍旅之聚散往來可顧盼盡諸蠻倚
為奧區桂平大宣鄉崇姜里為前庭象州東鄉武
宣北鄉為後戶藤縣五屯障其左貴縣龍山據其
右若兩臂然峽北巖峒以百計仙人關九層崖極
險峻峽以南有牛腸大岵諸村皆緣江立寨藤峽
府江之間為力山力山之險倍於藤峽又南則為
府江其中多冥巖奧谷絕壁層崖十步九折失足

隕身中產獠人藍胡侯槃四姓為渠魁力山又有
獠人善傳毒藥弩矢中人無不立斃四姓獠亦憚
之云

臣等謹按一統志大藤峽在桂平縣西北六十里
紅石磯之下弩灘之上地介武宣象州永安桂平
平南藤縣之間四山環繞縣亘數百里最為險惡
峽迤南舊有牛腸大砮諸村獠寨北通羅淥三洞
紫荊羅運等三十六巢巖洞以百計中有七層樓

下有三昧洞峽口有大藤長數丈橫生跨江日沉
水底夜浮水面徭人藉以渡峽以通龍山入寨者
明太祖洪武八年潯州大藤峽徭賊竊發柳州衛官軍
禽捕之

二十年知府沈信言府境接連柳象梧藤等州山谿
險峻徭賊出沒不常近者廣西布政司叅議楊敬恭
為大亨老鼠羅碌山生徭所殺官軍討之賊登巖攀
樹捷如猿猱追襲不及若久駐兵則瘴癘時發兵多

疾疫又難進取兵退復出為患臣以為桂平平南二
縣舊附徭民皆便習弓弩慣歷險阻若選其少壯千
餘人免其差徭給以軍器衣裝俾各團村寨置烽火
與官兵相為聲援協同捕逐可以殲之帝以蠻夷梗
化夙昔固然但當謹其防禦使不為患如為寇不已
則發兵討之何必團寨永樂三年桂平縣蠻民為亂
命姑撫之勿用兵宣德七年總兵官山雲奏斬獲桂
平等縣蠻寇覃公專等首級數帝顧左右曰蠻寇害

我良民譬之蝨賊害稼不可不去然殺之過多亦所不忍也

英宗正統二年命勦大藤峽等山蠻寇

山雲奏潯州府平南等縣耆民言大藤峽等山徭寇不時出沒劫掠居民阻絕行旅近山荒田為賊占耕而左右兩江人多食少其狼兵素勇為賊所憚若選委頭目屯種近山荒田斷賊出沒之路不過數年賊徒坐困地方寧靖臣已量撥田州等府族目土兵分

界耕守即委土官都指揮黃𣪠領之遇賊出沒協同
勦殺從之七年徠賊藍受貳等恃所居大藤峽山險
糾集大信等山山老山丁數百人遞年殺掠千戶滿
智等誘殺十人帝命梟之家口給賜有功之家十一
年大藤峽蠻賊流劫鄉村侵犯諸縣景泰七年大藤
峽賊糾合荔浦等處賊劫掠縣治殺擄居民天順五
年鎮守廣東中官阮隨奏大藤峽徠賊出沒兩廣為
惡累年邇來愈甚雖常會兵勦捕緣地里遼遠且兩

民患乃命都督僉事顏彪佩征蠻將軍印調南京江西及直隸九江等衛官軍一萬隸之六年彪率軍進勦大藤攻破七百二十一寨斬首三千二百七十一級復所掠男婦五百餘口帝敕獎之

天順七年大藤峽賊大掠梧州

時總兵官陳涇駐兵城中會太監朱祥等議調兵夜半賊駕梯上城涇不覺遂入府治劫庫放囚殺死軍

民無算大掠城中執副使周璫為質涇等倉卒無計
惟擁兵自衛隨軍器械并備賞銀物皆為賊有布政
使宋欽致仕家居挺身出以大義諭賊為所害黎明
賊聲言官軍若動則殺周副使涇等乃遣人與賊講
解晡時縱之出城賊既出乃縱璫還時官軍數千賊
僅七百而已都指揮邢斌奏至帝以梧州最爾小城
總兵鎮巡三司俱擁重兵駐城中乃為小賊所蔑視
命兵部即議處行

憲宗成化元年命僉都御史韓雍等率兵討大藤峽賊
兵部尚書王竑以峽賊稱亂日久皆由撫臣以招撫
為功致釀大患非大創不止因薦雍有文武才同征
廣將軍趙輔等率師討之時賊三千餘陷南平又入
藤縣城十一月大兵次潯州謀深入以覆其巢分兵
十五哨水陸並進腹背交攻連日鏖戰賊不能支破
賊寨及斬獲溺死者不可勝計改大藤峽為斷藤峽
刻石紀之捷聞降敕獎諭仍敕輔計議長策永絕後

患未幾雍奏殘賊侯鄭昂等夜入潯州府城大肆焚掠旋為官軍擊斬賊魁餘黨仍奔入巢既雍又奏諸徭之性憚見官吏攝以流官終難靖亂乃改設土官吏目等然府江東西兩岸大小桐江洛口與斷藤峽朦朧三黃等處村巢接壤路道崎嶇聚衆劫掠終不能除

武宗正德十一年總督陳金復督軍征府江諸蠻

金調兩廣官軍土兵分為六哨水陸並進斬七千五

百六十餘級金謂諸蠻利魚鹽耳乃與約商船入峽者計船大小給之魚鹽蠻就水濱受去如權稅然不得為梗蠻初獲利聽約道頗通金以此法可久易峽名永通諸蠻緣此無忌大肆掠奪稍不愜即殺之因循猖獗江路為斷時總督王守仁定田州還兩江父老遮道言峽賊阻害狀守仁上疏請討報可乃率湖南兵至南寧約日會兵寇聞湖兵且至皆逃匿守仁故為散遣諸兵狀寇弛不備乃令官軍突進連破油

碎石壁大皮等寨賊奔斷藤峽復追擊破之賊奔渡橫石江溺死俘斬甚衆賊潰散遂移兵仙臺花相白竹古陶羅鳳諸處賊不支奔入永安力山官軍次第破之禽斬俘獲無算八寨平兩江悉定

世宗嘉靖十八年官軍討賊藤峽復平

自兩江定守仁遂以土官岑猛子邦佐為武靖知州使靖遠孽邦佐不能輯衆且貪得賊賄峽北賊復獗有侯勝海者為首指揮潘翰臣誘殺之勝海弟公丁

聚衆譟城下僉事鄔閱等以千人往擊斬一阨寇還
漫言賊退請置堡堡成閱令土目黃貴韋香以三百
人往戍初貴香利勝海田廬故說翰臣殺海至是遂
奪勝海田廬於是諸徭俱恚邦佐又陰黨之公丁遂
嘯聚二千餘人乘夜陷堡城殺戍兵貴香走免事聞
命侍郎蔡經督兵討之公丁時出殺掠經乃會安遠
侯柳珣決計以兵事屬副使翁萬達萬達廉得百戶
許雄通賊狀詰之雄懼請自効萬達佯庇公丁捕繫

許訟公丁者數人公丁果遣人自列萬達佯許之又
令雄假稱貸為賄公丁喜益信雄會萬達巡他郡以
事屬叅議田汝成汝成召雄申飭之雄給公丁詣汝
成自列言寇堡事由他徭汝成亦慰遣之乃密授意
城中被賊害者家出毆公丁一市皆譁遊檄并逮公
丁入繫獄遣雄諭其黨曰寇堡事公丁委罪諸徭果
否諸徭遂言事自公丁聽論坐不敢黨乃檻致公丁
於軍門磔之首惡既誅乘勢進兵兩軍齊發左軍三

萬五千人分六道攻紫荊石門梅嶺木昂藤冲大坑
等巢右軍萬六千人分四道攻碧灘羅渌上中下洞
等巢南北夾擊賊大窘遂擁衆奔林峒而東官軍邀
擊之中斷復西奔諸軍合擊大破之追至羅連山平
南縣有小田羅應古陶古思諸猺亦據險勿靖萬達
等移兵勦之招降賊黨二百餘人江南胡姓諸猺歸
順者亦千餘人藤峽平

穆宗隆慶三年右江諸猺獍復亂官軍勦平之

府江自正德十二年都御史陳金征討之後且六十年而右江北三北五等巢素未懲創生齒日繁遂肆猖獗頃者大征古田各巢咸畏威斂戢獨府江右江恃險為亂兵部言若復縱之非惟無以固八寨懷遠之招亦恐以啟古田攜貳之漸勦之便巡撫郭應聘遂檄總兵官李錫等將兵往討以捷聞

南寧

元泰定帝泰定元年置南寧路

南寧故稱邕管牂牁峙其西北交趾踞其西南三十
六洞錯壤而居延袤幾千里橫山永平尤要害厯唐
及宋建牙置帥與桂州等先是至元十六年立邕州
路總管府兼左右兩江溪洞鎮撫至是改為路領縣
二曰宣化曰武緣

明太祖洪武五年宣化盜劫掠南寧府詔發廣西官軍
討之

初南寧衛覈民之無籍者為軍又縱所部入山伐木

民多擾遂相構為盜旋討平之

明史土司傳曰南寧郡地夷曠可宿數萬師成化時征田州及經畧南安舉弭節茲土後因徭蠻不靖往往仗狼兵急則藉為前驅緩則檄為守禦諸徭乃稍稍驕恣不可盡繩以法議邕事者謂宜開重鎮以復邕州督府之舊云領州四曰新寧曰橫州為流官曰上思州曰下雷州為土官上思州土官子孫畔服不常弘治十八年改流官嘉靖後仍

以上官襲下雷州明初印失廢為峒屬鎮安府嘉靖後改屬南寧

又曰歸德州果化州係土官弘治間皆為田州所侵削因改隸於南寧

欽定續文獻通考卷二百四十五

欽定四庫全書

欽定續文獻通考卷二百四十六

四裔考

西南夷

廣西土司二

廣東瓊州附

太平

元置太平路於麗江以控制左江溪洞州縣

太平漢屬交趾號麗江唐為羈縻州隸邕州宋平嶺

南於左右二江溪峒立五寨其一曰太平與古萬遷隆永平橫山四寨各領州縣峒屬邕州建武軍節度元仍為五寨後廢乃置太平路於麗江

明太祖洪武二年改太平路為府

先是帝以左江太平土官黃英衍等遣使齎印詣平章楊璟降旋遣中書照磨蘭以權齎詔往諭左右兩江溪峒官民曰睦茲兩江地邊南徼風俗質朴自唐宋以來黃岑二氏代居其間世亂則保境土世治則

修職貢良由其審時知幾故能若此頃者命將南征
八閩克靖兩廣平定爾等不煩師旅奉印來歸嚮慕
之誠良足嘉尚其益懋厥職以安居民以權至廣西
衛鎮撫彭宗等以兵護送將抵兩江適來賓洞蠻寇
掠楊家寨居民以權謂奉詔遠來見賊不擊何以庇
民乃督宗等擊之賊敗走遂安輯其地兩江皆懾服
焉至是乃改為太平府

宣宗宣德元年崇善土知縣趙暹作亂官軍平之

暹謀廣地界遂招納亡叛攻左州執故土官奪其印
殺其母大肆擄掠占據村洞四十餘所造火器建旗
幟僭稱王署偽官流劫州縣帝命總兵官顧興祖會
廣西三司勦捕暹扼寨拒守進圍之給出所奪各州
印撫諭脇從官民使復職業暹計窮從間道遁伏兵
邀擊及其黨皆就禽

臣等謹按明史土司傳太平領州縣以十數大約
元屬太平路明初皆以世職授歸附之土官而設

流官佐之太平州舊名瓠陽為西原農峒地唐為
波州宋隸太平寨元土官為李以忠鎮遠州舊名
古隴宋置隸邕州元土官為趙勝昌茗盈州宋置
亦隸邕州元土官為李鐵釘安平州舊名安山亦
西原農洞地唐置波州宋析為安平州元土官為
李郭佑思同州舊名永寧為西原地唐置邕州宋
隸太平寨元土官為黃克嗣養利州元土官為趙
日泰萬承州舊名萬陽唐置萬承萬形二州宋省

萬形隸太平寨元土官為許郭安全茗州舊名連
岡為西原地宋置隸邕州元土官為李添慶結安
州舊名營周亦西原農峒地宋置結安峒隸太平
寨元土官為張仕榮龍英州舊名英山宋為峒元
改州土官為李世賢結倫州舊名邦兇亦西原農
峒地宋置安峒隸太平寨元改州峒長為馮萬傑
都結州元土官農姓上下凍州舊名凍江宋置凍
州元分上下凍二州尋合為一土官為趙貼從思

城州亦西原農峒地唐置州宋分為上下思城二
州隸太平寨元至元間并為一土官為趙雄傑永
康州宋置縣隸遷隆寨元土官楊姓左州舊名左
陽唐置隸邕州宋隸古萬寨元土官為黃勝爵羅
陽縣舊名福利陀陵縣舊名駱陀皆宋置元土官
為黃宣黃富俱於洪武初歸附者也

思明

元世祖至元二十四年置思明路

改為路

臣等謹按元史世祖紀改思明等四州並為路係

二十三年十一月事

明太祖洪武初改思明路為府

二十五年思明知州門三貴謀殺知府黃廣平廣平
覺而殺之乃以病死聞於朝詔逮鞠之帝謂刑部曰
蠻寇相殺性習固然廣平不以實言宜繩以法今姑

宥之使其改過命給道里費遣還

二十九年遣使諭安南還思明舊地

土官黃廣成奏自故元改思明路所轄左江一路州縣峒寨東至上思州南至銅柱元兵征交趾去銅柱百里設永平寨置兵戍守命交人供其軍餉元季擾亂交人以兵攻破永平寨遂越銅柱二百餘里侵奪思明屬地邱溫如熬慶遠淵脫等五縣逼民附之以是五縣歲賦皆土官代輸前者本府失理於朝遂致

交人侵迫益甚及告禮部立站於洞登洞登實思明地而交阻乃稱屬銅柱界蒙朝廷遣官覈其事建武志尚可考乞敕安南還舊封庶疆域復正歲賦不虛帝令戶部錄所奏遣官往諭安南三十年安南王陳日焜議論往復久而不決以譯者言不達意復為書曉之安南終辯論不已無還地意廷臣議其抗命當誅帝以蠻人怙頑不悛終必取禍姑待之三年廣成又奏安南侵奪其祿州西平州永平寨地請遣使諭

還從之

明史土司傳曰景泰三年土知府黃瑯致仕以子
鈞襲瑯庶兄都指揮琰欲殺鈞代以己子琰守備
潯州托言徵兵思明府令其子糾衆結營於三十
里外馳至府襲殺瑯一家支解瑯及鈞甕葬後圃
仍歸原寨明日乃入城詐發哀遣人報琰捕賊以
掩其迹方殺瑯時瑯僕福童得免走憲司訴其事
且以徵兵檄為證郡人亦言殺瑯一家者琰父子

也珘自度禍及乃謀迎合朝廷意奏永固國本事
請易儲奏入帝命多官會議以聞珘為此舉衆皆
驚愕謂必有受其賂而教之者或疑侍郎江淵云
事成珘得釋罪且進秩英宗復辟珘聞自殺帝命
發棺戮屍其子震亦為都督韓雍捕誅

世宗嘉靖四十一年以勦平猺獞功命土官知州男黃
承祖暫襲本職

至萬曆十六年思明州土官黃拱聖謀奪襲殺其母

兄拱極等五人而思明知府黃承祖乘亂掠村寨為之援按臣請以拱聖及諸凶正法思明州改屬流府革承祖冠帶立功自贖而追其所掠更令族人黃思護拱極妻許氏撫遺孤世延待其長官之三十二年總督戴耀奏思明叛目已禽土官黃應雷縱僕起釁棄印而逃斷難復官黃應宿爭地殺戮六哨成仇且係義子不應襲職黃應聘係承祖幼子人心推戴似應承襲知府以存黃氏宗祀但年甫七歲暫令流官

同知署府事待至十五歲交印接管應雷既廢不宜
同城應降為土舍其後永襲土舍給田養贍制其出
入應宿仍管故業俱屬思明府節制從之

明史土司傳曰崇禎十三年總督張鏡心疏報土
官殺職官思明州黃日章黃德志等鼓衆叛逆帝
令逮禽首惡以靖地方論者以黃玠神奸身遭大
難世濟其兇傳及四世猶併思明州而有之王綱
隳矣然骨肉相屠至是四見蓋天道云

又曰思明州東抵思明府西抵交趾界南抵西平
州北抵龍英州土官黃姓與思明府同族洪武初
黃君壽歸附授世襲知州後為黃瑛所并萬厯十六
年黃拱聖之亂改屬太平上石西州宋屬承平寨
元屬思明路明初屬思明府至萬厯三十八年
改屬太平府州更土官趙氏何氏黃氏凡三姓皆
絕始改流官下石西州宋分石西州置元屬思明
路洪武二年土官閔賢歸附授世襲知州設流吏

目佐之忠州宋置隸邕州元屬思明路洪武初土
官黃威慶率子中謹歸附授威慶江州知州中謹
忠州知州皆世襲其鄰地有四峒者界於南寧思
明忠江之間思明忠州屢肆侵奪副使翁萬達議
改峒名四都隸之南寧地方稍定隆慶三年冬思
明府土官黃承祖奏取四都地忠州土官黃賢相
爭之遂擅立總管諸名目分兵數千戍守因縱令
剽掠為禍甚烈僉事譚惟鼎調永康典史李材以

計禽賢相斃之於獄議改流官不果遂改隸州於
南寧仍以州印子賢相子有瀚俾襲職憑祥宋為
憑祥洞屬永平寨元屬思明路洪武十八年土蠻
李昇歸附置憑祥鎮巡檢屬思明府永樂二年置
縣成化八年升為州以昇孫廣寧為知州廣寧有
十子廣寧死諸子爭立不決凡三四年乃以孫珠
襲知州職嘉靖十年珠死弟珍珏爭立珍挈印走
況村珏攝州事十四年州目李清趙琪等謀納珍

許思明府黃朝以州屬之朝遂以兵納珍於憑祥
珏奔磬柳既珍悔屬思明與朝隙朝以外婦所生子
時芳詭云廣寧孫以兵千人納之時珍淫縱為部
民所怨於是廣寧季子寰以尊屬謀廢立十七年
寰遂殺珍而附於安南莫登庸藉為嚮導總督蔡
經屬副使翁萬達禽之論死於是珏與時芳復爭
立時芳倚思明勢州民皆右之萬達黜珏而論時
芳死更立李佛嗣珍為知州憑祥遂定

又曰江州界東抵忠州西抵龍州南抵思明北抵
太平府宋置州隸古萬寨元屬思明路明初土官
歸附世襲知州嘉靖四十二年以平徭獍功准江
州土官子黃恩暫署本職

又曰思陵宋置州屬永平寨元屬思明路洪武初
省入思明府二十一年復置州其界東至忠州西
北至思明南至交趾

思恩

元以思恩州屬田州路

思恩漢屬交趾唐為州屬邕乃澄州止戈縣地宋開
寶間廢澄州以止戈賀水無虞三縣省入上林治平
間以上林之止戈入武緣隸邕元屬田州路歷代羈
縻而已

明英宗正統三年進思恩土知州岑瑛職為知府仍掌
州事

先是洪武時田州土知府岑堅子永昌為思恩土知

州永昌死子瑛襲至是以瑛有謀畧善治兵從征蠻
寇屢有功故有是命因與知府岑紹交惡從總兵官
等議升思恩為府俾瑛紹各守疆土以杜侵爭

憲宗成化十六年思恩土知府岑鑑會討土目黃明之
亂平之

鑑瑛之子也田州府土目黃明作亂知府岑溥避入
思恩鑑會鎮守官討平之巡撫朱英請獎鑑功鑑死
子濬襲弘治十二年田州土官岑溥為子獠所殺獠

亦死次子猛幼頭目黃驥李蠻構難督府命濬調衆
護猛驥厚賂濬并獻其女且約分地與濬濬以兵屬
驥送猛至田州不得入猛遂久留濬所及總鎮諸官
攝濬乃出猛襲知府濬從索故分地不得怒約泗城
東蘭二州攻劫田州殺掠萬計城郭為墟濬兵二萬
據舊田州劫龍州印納故知府趙源妻岑氏及總兵
官詣田州勘治黃驥懼匿濬所先是濬築石城於丹
良莊屯兵千餘人截江道以括商利官命毀之不聽

會官軍自田州還乘便毀其城濬兵來拒官軍敗之
總鎮及巡按等官請治濬罪而叅政武清納濬賂曲
護之十七年濬掠上林武緣等縣又攻破田州猛僅
以身免總鎮以聞兵部請調三廣兵勦之十八年濬
死城中人獻其首思思遂平

世宗嘉靖七年思思設土巡檢九司

先是兵部議濬既伏誅不宜再錄其後改設流官擇
其可者以雲南知府張鳳升廣西右叅政掌思思府

事正德七年增設鳳化縣治時初設流官諸蠻未服相繼作亂嘉靖四年都御史盛應期遣官軍平之六年土目王受與田州盧蘇謀煽亂勢復熾新建伯王守仁受命至一意招撫而檄受等破八寨賊因列思思地為九土巡檢司管以頭目曰興隆曰那馬曰白山曰定羅曰舊城曰下旺曰安定曰都陽曰古零授王受白山司巡檢得比於世官又以思思舊治瘴霧昏塞宜更之奕壇於是擇地荒田建新郡割武緣止

戈二里益之又議割上林三里而移鳳化縣治於其處蓋寓犬牙相錯之意巡撫林富謂遷郡及割止戈里應如守仁議至以三里當設衛而併鳳化縣裁之遂令府治益孤其後九司頭目日恣所轄蠻民不堪知府陳璜曲加綏戢目把劉觀盧回以復土為名鼓衆作亂副使翁萬達因有事安南計禽盧回殺之招回從亂者三十餘人最後東蘭岑瑄詐稱岑濬子起雲謀復土官為九司頭目所縛萬厯七年督撫吳文

華謂九司日以驕黠編氓甚少緩急難恃請割南寧武緣縣屬思恩自是思恩稱巨鎮云

鎮安 歸順州附

元世祖至元十八年召溪洞新附官鎮安州岑從毅入覲

先是宋於鎮安峒建右江宣撫司元改鎮安路時從毅縱兵殺掠迫死知州李顯祖故召之入覲二十九年從毅降以老疾詔其子斗榮襲佩虎符為鎮安路

軍民總管泰定帝泰定三年鎮安路總管岑修廣為弟修仁所攻來告又岑世興及鎮安路岑修文合山獠角蠻六萬餘人為寇命湖廣雲南行省招諭之

明太祖洪武元年改鎮安路為府

鎮安路歸附以舊治僻遠移建廢凍州改為府永樂中向武知州黃世鐵侵奪鎮安高寨等地朝廷遣兵討平之以其地屬鎮安成化八年知府岑永壽姪宗紹糾集土兵攻破府治殺傷嫡母流劫鄉村都指揮

岑瑛禽斬之嘉靖十四年田州盧蘇作亂糾歸順州土官岑猷攻毀鎮安府帝命新建伯王守仁治之

明史土司傳曰時蘇倡亂田州無主鎮安府土官男岑真寶以兵納岑邦佐於田州歸順州岑猷蘇壻也及向武州黃仲金皆與真寶隙乘真寶入田州蘇遣猷及仲金襲破鎮安真寶聞亂走還蘇會目兵追圍之武陵寨猷等遂發真寶父母墓焚其骸分兵占據諸洞寨真寶訴之軍門督諭猷等久

之乃解官軍歸真寶於是璫與真寶互相訐巡按御史言土蠻自相讐非有所侵犯從未減

又曰歸順州舊為峒隸鎮安府永樂間鎮安知府岑志綱分其第二子岑永綱領峒事傳子瑛屢率兵報効弘治九年總督鄧廷瓚言鎮安府之歸順峒舊為州治洪武初裁革今其峒主岑瑛每効勞於官乞設州治授以土官知州凡出兵令備土兵五千仍歲領土兵二千赴梧州聽調詔從之增設

流官吏目一員瑛死子璋襲復從璋奏以本州改
隸布政使璋多智畧田州岑猛以不法獲譴都御
史姚鏌將舉兵討之璋猛婦翁也鏌慮璋黨猛召
都指揮沈希儀謀希儀雅知璋女失寵恨猛又知
部下千戶趙臣雅善璋希儀因使趙臣語璋圖猛
璋受命時猛子邦彥守工堯隘璋詐遣兵千人助
邦彥言天兵至以姻黨故且與爾同禍今發精兵
來幸努力堅守邦彥欣納之璋遣人報希儀曰謹

以千人內應矣時田州兵殊死戰諸將莫利當隘者希儀獨引兵當之約戰三合歸順兵大呼曰敗矣田州兵驚潰希儀麾兵乘之斬首千餘級邦彥死焉猛聞敗欲自經而璋先已築別館使人請猛時猛倉皇不知所出遂挈印從璋使走歸順璋詭為猛草奏促猛出印實封之璋既知猛印所在乃鴆殺猛斬其首并府印函之間道馳軍門為讒言所阻竟不論功璋死次子璵襲嘉靖四年提督盛

應期以璫先助猛逆攻泗城許自新出兵討賊自
贖從之十四年田州盧蘇叛糾璫攻鎮安府璫破
鎮安并發岑真寶父母墳墓事聞革冠帶許立功
贖璫後從征交趾卒於軍子代襲

田州 恩城州等附

元置田州路軍民總管府

田州古百粵地漢屬交趾郡唐隸邕州宋始置田州
屬邕州橫山寨元改置田州路

明太祖洪武元年田州土官降

初改路為府省來安府入焉後改州領縣一曰上林
時大兵下廣西右江田州府土官岑伯顏遣使齎印
詣平章楊璟降六年田州溪峒蠻賊竊發伯顏討平
之十七年田州知府伯顏子岑堅泗州知州岑善忠
率其土兵討捕猺寇令選取壯丁各五千人立二衛
以善忠子振堅子永通為千戶統衆守禦且耕且戰
此古人以蠻攻蠻之法從都指揮耿良奏也

英宗天順元年田州頭目呂趙作亂命勦捕之

呂趙偽稱敵國大將軍張旗幟鳴鉦鼓率衆刼掠南丹州又據向武州命武進伯朱瑛及土官岑瑛勦捕三年勢愈獷殺知府岑鑑占據地方偽稱太平王圖謀岑氏宗族冒襲知府職事四年巡按御史吳禎奏奉勅勦捕反賊呂趙選調官軍土兵攻破功饒婁鳳二關直擣府城呂趙攜妻子挾知州岑鐸等宵遁官軍追至雲南富州奪回鐸等及其子若婿斬首四十

九級賊衆悉降趙以數騎走鎮安府追及之斬趙及其子與從賊者獲其妻孥及偽太平王木印無敵將軍銅印并鳳旗盔甲等物復委知府岑鏞仍掌府事撫安人民田州平帝遣使齎敕獎諭禎等并敕鏞謹守法度保全宗族成化元年遣使齎敕諭鏞并賜銀幣以其所部土官狼兵屢調勦有勞且有事於大藤峽也

憲宗成化十六年田州頭目黃明作亂尋被誅

知府岑溥走避思恩總督朱英調軍捕明明敗走為

恩城知州岑欽所執并族屬誅之已溥復與欽交惡

欽溥叔也

欽攻奪田州逐溥時泗城州土官岑應方恃兵

強復黨欽殺擄人民二萬六千餘與欽分割田州而

據其地至弘治三年總制遣官護溥之子猯入田為

欽所遏居潯州按察使陶魯率官軍次南寧欽拒敵

敗走而應復援之入城陳兵以備巡撫秦紘請合貴

州湖廣及兩廣兵勦之欽勢蹙乞兵於應遂匿應所

五年總鎮官因檄應捕欽欽從應飲殺應父子於坐
收其兵以拒官軍已而應弟岑接佯以兵送欽至田
州界亦殺其父子以報事聞廷議仍命溥還田州

孝宗弘治十八年以流官掌田州府事

先是十二年岑溥為子獠所殺獠亦自殺次子猛方
四歲溥母岑氏及頭目黃驥護之赴制府告襲歸至
南寧頭目李蠻來迎驥慮蠻奪已權殺其使蠻率兵
至舊田州驥懼誣蠻將為變乞以兵納乃調思恩岑

濬率兵衛猛濬受驥賂納其女挾猛約分其六甲地
比至田州蠻拒不納驥復以猛奔思恩幽之事覺總
督鄧廷瓚檄副總兵歐磐等擗濬久乃出猛置於會
城得奏命猛襲知府驥濬怒其事之不由己出也要
泗城岑接東蘭韋祖鎰各起兵攻蠻接兵二萬先入
田州殺掠男女驅之溺水死者無算括府庫放兵大
掠城郭為墟濬兵二萬攻舊田州據之殺掠男女五
千三百餘人蠻逃去歐磐及叅政武清等詣田州府勘

治遣兵送猛還府驥懼罪匿濬家有司請治濬罪
初蠻之迎猛也無他念及猛在外蠻守土以待其歸
驥爭權首亂濬接祖鉉黨惡以致茲變清受濬賂曲
右之且誣蠻占據府治阻兵弄權事竟不直於是廷
瓚言思思岑濬罪惡正在逐捕而田州岑猛亦宜乘
此區畫降府為州毋基異日尾大之患從之至是廷
議以思田既平宜設流官岑猛世濟兇惡致陷府治
宜降授千戶而遴選才望者假以方面職銜守田州

仍賜敕以重其權帝然之於是以平樂知府謝湖為
右參政掌府事時岑猛已降福建平海衛千戶遷延
不行及湖至復陳兵自衛令祖母岑氏奏乞於廣西
極邊率部立功以便祭養而總督陳金奏猛據舊巢
要求府佐不赴平海衛參政謝湖不即赴任為猛所
拒納餽遺而徇其要求宜逮問時猛遣人重賂劉瑾
得旨留猛而褫湖并及前撫潘蕃劉大夏猛竟得同
知攝府事猛撫輯遺民兵復振稍復侵旁郡自廣嘗

言督撫有調發願立功冀復舊職會江西盜起陳金檄猛從征猛所至剽掠然以賊平論功遷指揮同知世宗嘉靖六年田州告捷於京師

岑猛論功遷官非其初意頗怨望先是二年率兵攻泗城拔六寨遂克州治岑接告急於軍門言猛無故興兵攻寨猛言接非岑氏後據其祖業欲得所侵地時方有上思州之役徵兵皆不至四年提督盛應期巡按謝汝儀議大征猛條征調事宜而應期以他事

去詔以都御史姚鏌代命懸金購猛然鏌知猛無反
心猛方奏辯鏌亦緩師而汝儀與鏌卻乃誣鏌之子
淩納猛萬金廉得淩書獻之鏌惶恐乃再疏請征於
是部趣鏌尅期進鏌偕總兵官朱麟發兵八萬以都
指揮沈希儀張經等統之分道並入猛聞大兵至令
其下母交兵裂帛書冤狀陳軍門乞憐鏌不聽督兵
益急沈希儀斬猛長子邦彥於工堯隧猛懼謀出奔
而歸順州知州岑璋猛婦翁也其女失愛璋欲藉此

報猛甘言誘猛走歸順鴆殺之斬首以獻六年鎮以
田州平告捷京師乃請改田州為流官并陳善後七
事詔俱從之

七年新建伯王守仁撫定田州

先是改設流官姚鎮留叅議汪必東僉事申惠叅將
張經以兵萬人鎮其地知府王熊兆署府事會必東
惠皆移疾他駐惟經熊兆在府兵勢分防守稍懈逆
黨盧蘇王受等乃為偽印誑言猛在且借交趾兵二

十萬以圖興復蠻民信之聚衆薄府城經出擊兵少
不敵欲引還而城中陰為內應呼譟四出官軍腹背
受攻力戰不支突圍渡江走爭舟溺死者甚衆賊沿
江置閘索伏藥弩夾岸並起官軍且戰且行抵向武
失士卒三四百人賊遂入據府城燒倉粟以萬計御
史石金上其事頗委罪前撫盛應期生事召釁而給
事中鄭自璧因請仍檄湖廣永順保靖兵併力勦賊
帝以四方兵數萬方歸休豈可復調命再計機宜以

聞時盧蘇等雖據府叛佯聽撫遣人迎署府事王熊
兆而其黨王受等糾衆萬餘攻據思恩城已而亦投
牒上官願聽招撫姚鎮以兵未集姑受之以緩其謀
遣牒者檄東蘭歸順鎮安泗城向武諸土官各勒兵
自効且責失事守巡叅將等官立功自贖復疏調湖
廣永保土兵江西汀贛畬兵俱會於南寧併力進剿
帝以蠻亂日久鎮巡官受命大征未及殄絕輒奏捷
散兵使餘孽復滋罪不容逭姑赦前過益圖新功乃

起王守仁總督軍務同鎮討之至是悉受撫歸業

明史土司傳曰守仁威名素重及督軍務調兵數萬人至諸蠻心懾守仁至南寧道中見受等勢盛度亦未可卒滅上疏極陳用兵利害兵部議所見未確復陳五事令詳計其宜於是守仁又疏云思田禍結兩省已踰二年今必欲窮兵盡勦則有十患若罷兵行撫則有十善臣與按臣及藩臬諸將領等攄心極論今日之局撫之為是臣抵南寧遂

盡撤調集防守之兵數日內解歸者數萬惟湖兵
數千道阻遠仍使分留南寧解甲休養待間而動
而盧蘇王受願得歸境投生乞宥一死臣等諭以
朝廷威德令齎飛牌歸巢曉諭期以速降無死蘇
受等皆羅拜踴躍歡聲雷動尋率衆至南寧城下
分屯四營蘇受等囚首自縛與頭目數百人赴軍
門請命臣等復諭之曰朝廷既赦爾罪爾等擁衆
負固騷動一方若不示罰何以雪憤於是下蘇受

於軍門各杖一百乃解其縛又諭之曰今日宥爾死者朝廷好生之德必杖爾者人臣執法之義衆皆叩首悅服願殺賊立功臣隨至其營撫定其衆七萬餘人於二月二十六日悉命歸業不折一矢不傷一人而全活數萬生靈即古舞干之化奚以加焉疏聞帝嘉之

又曰帝遣行人齎敕獎賚於是守仁復疏曰田州外捍交趾內屏各郡深山絕谷猺獠盤據使盡誅

其人異日雖欲改土為流誰為編戶非惟自撤其藩籬而拓土開疆以資鄰敵非計之得也今岑氏世効邊功猛獨註誤觸法雖未伏誅聞已病死臣謂治田州非岑氏不可請降田州府為田州而官其子以存岑氏之後查猛有二子長邦佐自幼出繼為武靖知州武靖當徭賊之衝邦佐才足制馭宜仍舊職而今所建州請以猛幼子邦相授吏目署州事俟後遞升為知州以承岑氏之祀設土巡

檢諸司即以盧蘇王受等九人為之以殺其勢添設田寧府統以流官知府以總其權從之

又曰八年守仁於思田既議設流官又議移南丹衛於八寨改思恩府城於荒田改設鳳化縣治於三里添設流官縣於思龍增築五鎮城堡於五屯及侍郎林富繼之又言田州界居南寧泗城交通雲貴交趾為備非一不宜改設流官南丹衛設在賓州既不足以遙制八寨遷八寨又不得以還護

賓州為今日計獨上林之三里守仁所議設縣者
遷南丹衛於此夫設縣則割賓州之地以益思恩
是顧彼而失此也遷衛則扼八寨之吭以還護賓
州是一舉而兩得也然不宜屬田州而仍屬南寧
為便其議與守仁頗有異同詔從富言

又曰初邦相兄邦彥有子芝依大母林氏瓦氏居
官給養田其後邦相惡蘇專擅密與頭目盧玉等
謀誅蘇及芝又侵削二氏原食莊田二氏遂與蘇

合謀以芝奔梧州赴軍門告襲蘇又為芝疏請尋
令人刺邦相邦相覺殺行刺者而蘇遂伏兵殺盧
玉等以兵圍邦相宅乘夜與瓦氏縊死之事聞帝
命守仁亟為勘處蘇之殺邦相也歸順鎮安泗城向
武諸土官羣起構難互相訐奏當事者謂芝承襲
未定田州無主致令鄰封覬覦當給劄付令芝管
事蘇又請早給芝冠帶以撫田州而自願裹糧立
功及追補累年所逋糧賦部議以土蠻讐殺當從

末減皆令立功贖罪三十二年芝死子大壽方四
歲土人莫葦冒岑姓及土官岑施相煽搆亂提督
郎欽奏令思恩守備張啟元暫駐田州鎮之三十
四年田州土官婦瓦氏以狼兵應調至蘇州勦倭
隸總兵俞大猷麾下以殺賊多詔賞瓦氏及其孫
男岑大壽大祿銀幣餘令軍門獎賞四十二年以
平廣西徭獍功准岑大祿實受知州職

光宗泰昌元年田州土官作亂督臣請正其罪從之

總督許弘綱奏土官岑懋仁肆惡起釁窺占上林

林上

在田州東洪武二年土官黃嵩歸附授世襲知縣流官典史佐之

納叛人黃得隆等

糾衆破城擅殺土官黃德勲擄其妻女印信乞正其罪詔令懋仁速獻印執送諸犯聽按臣分別正法違則進勒有功優叙從之田州世岑氏改流者再而終不果盧蘇再叛弑主終逸於罰論者以為失刑云

明史土司傳曰思城唐置州宋元仍舊明初因之隸廣西成化十九年知州岑欽與田州土官岑溥

相讐殺

詳田州
土司傳

有司以恩城宜裁革從之州遂廢

又曰上隆宋置州隸橫山寨元屬田州路明因之

洪熙元年土知州岑瓊母陳氏來朝宣德四年瓊
卒無子土人訴於朝願得陳氏襲職詔以為知

州

又曰都康宋置州隸橫山寨元屬田州路明洪武
間為蠻獠所據三十二年復置隸布政司土官馮
姓其界東南抵龍英西至鎮安北至向武

泗城 利州附

元以泗城州屬田州路軍民總管府

泗城州宋置隸邕州橫山寨元屬田州路其界東抵東蘭西抵上林長官司南抵田州北抵永寧明初移治古礪洞隸廣西

明太祖洪武五年泗城歸附

時以土官岑善忠世襲知州至宣德八年致仕女土官盧氏奏襲職土官岑豹率土兵千五百餘人謀害

已又棄毀故土官岑瑄塑像所為不孝難俾襲職豹叔利州知州顏亦奏豹興兵謀殺盧氏州民被害都督山雲奏豹竇故土官瑄姪人所信服應襲職盧氏瑄妻豹伯母初借襲今致仕宜量撥田土以贍終身仍請敕豹無肆侵擾帝敕雲會三司巡按究豹與盧氏是非從公判決

英宗正統二年都督山雲乞發兵勦泗城

泗城土官岑豹攻利州掠其叔顏妻子財物不服撫

諭增兵拒守雲乞勦之帝不許五年顏奏豹侵占及掠擄罪頭目黃祖亦奏豹殺其弟籍其家岑瑄女亦奏豹占奪田地人民囚其母盧氏帝遣官齎敕諭之并敕廣西貴州總兵官親詣其地令速還所侵掠如不服相機禽捕正德六年總兵官柳溥奏委官諭豹退還原占利州地豹時面從及回占如故今顏欲以利州利甲等莊易泗城古那等甲開設利州衙門宜從其請發附近官軍送顏赴彼撫治蠻民倘豹仍拒

逆則率兵勦捕之十年豹復奏顏占據其地帝令速
子議處不可因循貽邊方害成化元年豹聚衆四萬
攻劫上林殺土官岑志威據其境土兵部言豹強獷
如此宜調兵禽捕明正典刑從之未幾豹死弘治三
年豹之子應復據上林及貴州鎮寧等處一十八城
時思城土官岑欽攻奪田州應與欽黨既復相讐殺
詳田州土司傳兵部奏欽連年構禍而應黨之復據上林長
官司流毒不少今天厭禍假手相殘實地方之幸所

占鄰壤及土官印信數多亦宜勘斷以除禍本并令
應弟接退還侵地及印信乃許承襲泗城地廣兵多
宜選頭目量授職銜分轄以殺其勢詔下總鎮官區
處十年總督鄧廷瓚奏接往年隨征都勻府江等處
有功乞畧其祖父罪令承襲世職以圖報効廷臣議
劫印侵地雖係接祖父罪然再四撫諭接不肯歸之
於官遽使襲職則志益驕非馭土官法十二年田州
土目黃驥作亂要接為聲援殺掠男婦劫燒倉庫民

廬又刼府學及橫山驛印記遂據興仁十四年貴州賊婦米魯作亂提督王軾請調接領土兵二萬營於砦布河因敕接自備兩月餉尅期調赴

明史土司傳曰弘治十八年泗城土官岑九仙奏自始祖岑彭以來世襲土官至豹子應羅欽之禍子孫滅亡殆盡其弟接衆推護印累著勞勩乞令襲職俾轄蠻衆兵部尚書劉大夏等議豹乃叛臣餘孽子應復自取滅亡今接者人皆傳稱為梁接

非應親枝又不知岑九仙是何逋逃冒為奏擾大
夏先在兩廣見岑氏譜岑之始祖木納罕於元至
正年間與田州知府之祖伯顏一時授官今九仙
妄援漢岑彭世次塵瀆聖聽請治其罪其岑接應
襲與否前已令鎮巡官勘奏岑九仙雖蠻人難以
深究亦當摘發以破其奸從之

穆宗隆慶二年泗城蠻作亂官軍擊走之

時黃豹黃多等據貴州程番府麻嚮大華等司時出

擄掠官軍進勦豹等遁去泗城延袤頗廣兵力亦勁
與慶遠諸州互相雄長其流惡自豹而應而接且三
世領縣一曰程縣長官司二曰安隆曰上林

明史土司傳曰利州漢屬交趾號板麗莊宋建利
州隸橫山寨元因焉土官亦岑姓洪武初歸附授
知州以流官吏目佐之正統元年泗城岑豹據其
地并掠知州岑顏妻子財物七年豹復與顏相仇
殺帝敕令罷兵而豹終殺顏及其子得奪州印去

遂以流官判州事數十年間屢經諸司勘奏移檄
督追歷岑應岑接二世如故嘉靖二年歸併泗城
龍州

元成宗大德中升龍州為萬戶府

龍州古百粵地漢屬交趾宋置龍州隸太平寨至是
升為萬戶府

明太祖洪武八年改龍州隸廣西布政司

土官知州趙帖堅言地臨交趾所守關隘二十七處

有警須申報太平達總司比報下已涉旬月恐誤事
機乞奉議泗城二州隸廣西便從之

孝宗弘治十二年思恩土官岑濬劫龍州

先是趙帖堅無子以姪宗壽襲宗壽死子景升襲景
升無嗣以叔仁政襲仁政再傳為趙源源死無子岑
濬率兵攻田州回劫龍州奪其印納故知府源妻岑
氏詔下鎮巡官勦賊而議立為源後者以源庶兄浦
有二子相居長當立相弟楷不能無望則謀於岑氏

以僕韋隊子璋詭云遺腹岑氏恃兄子猛方英雄措
遂奏言璋實源子當立為相所篡事下督府勘未決
璋賂鎮守大監傅倫舍人詭稱有詔檄猛調二萬兵
納璋入龍州左江大震相挈印奔況村都御史楊旦
討璋猛殺之相乃歸

明史土司傳曰相二子長燧次寶相枝拇寶亦枝
拇相絕愛之曰肖我當立猛乃以寶去髡為奴嘉
靖元年相死州人立燧楷弒之州人立其族弟煖

時王守仁提督兩廣幕客岑伯高用事楷賂伯高
言煖非趙裔當立者楷也遣上思州知州黃熊兆
覈之熊兆黨伯高言楷當立以州印畀楷楷遂殺
煖龍州大亂州目黃安等潛往田州購寶寶時為
奴楊布家十三年矣安等行百金購得之言之督
府都御史林富謂楷勢已張毋持之急乃令楷攝
職俟寶長讓之楷復時時謀殺寶富諭楷令以印
還寶寶謝以五千金益以腴田三十一村楷計寶

弱易與不如邀厚利而徐圖之遂聽命楷復求韋
璋之子應育之令往來寶所寶妻黃氏思明府土
官黃朝女也貳於寶而與應通應乃厚結州目又
數遣人與向武州締好乞兵為衛寶日荒悍刑狡
男子王良為閹楷知良恨寶激使內應良許之楷
以千人夜至寶寢門呼良良開門納楷兵執寶寢
所斬之以他盜聞應以兵千人據州并結朝自援
都御史蔡經屬副使翁萬達謀之萬達謂楷狙詐

未可速圖韋應翼慙寡慮可旦夕禽斷其中堅然
後可次第獲督撫善之萬達行部至太平使人以
他事召朝諭之計論應當死言楷才勇正須藉為
龍州當一面耳時諸言楷事者故不為理州人大
譁萬達愈厚指楷信之遂統精兵千人詣萬達言
狀并以三十一村地獻萬達召楷及州目鄧瑀等
入見伏壯士劫之曰汝罪大宜自為計誠死尚可
為爾子留一官楷自分無生理乃手書諭其黨曰

業已如此亂無益也可善輔我子以存趙萬達即
杖稽斃之以稽書諭其州人時稽子匡時生四年
矣立之一州悉定乃以十三村還龍州十八村隸
崇善縣於是龍州趙氏仍得襲

奉議

向武附

元以奉議州屬兩江道

奉議宋置州初屬靜江軍節度使後屬廣西經畧安
撫司至是屬廣西兩江道宣慰司

明太祖洪武七年以土官黃志威為奉議州知州

志威舊為田州府總管來歸附

志威即向武土知州世職父

六年

招撫奉議等州百十七處人民皆欽服帝嘉其功命以安州侯州陽縣屬之至是以為知州兼守禦直隸廣西行省至二十八年奉議南丹等處蠻人梗化都督楊文討平龍州移兵勦奉議賊帝遣使諭文等近聞奉議兩江溪峒等處林木陰翳蛇虺遺毒草莽中雨過流毒溪澗飲之令人死師入其地行營駐劄勿

飲山溪水泉恐餘毒傷人宜鑿井以飲其慎察之師
至奉議州蠻寇悉竄入山林據險自固文督諸將分
兵捕之復分道攻南丹叛寇

明史土司傳曰初楊文等駐師奉議州之東南分
兵追捕賊黨且遣人招降其脅從者賊皆焚廬舍
走山谷憑險阻立柵自固文督將士屢攻破之賊
衆潰散左副將軍韓觀等遂分兵追討都康向武
富勞上林諸州縣破其更吾蓮花大藤峽等寨斬

向武土官黃世鐵并其黨萬八千三百餘人招降
蠻民復業者六百四十八戶徙置象州武山縣蠻
寇遂平時兵部尚書致仕唐鐸叅議軍事以朝廷
嘗命征勦畢日置衛守之乃會諸將相度形勢置
奉議等衛并向武河池懷集武仙賀縣等處守禦
千戶所設官軍鎮守詔從其言正統五年土官黃
宗允科歛劫殺甚且欲戕其母母避之殺母侍者
以洩怒為母所告帝敕總兵官柳溥及三司按驗

以聞嘉靖四年田州岑猛叛奉議土官嘗助猛攻泗城州提督盛應期許其自新令出兵討賊以功贖罪後土官知州死皆以土叛官掌州事論者以奉議彈丸地三面交迫田州獨南界鎮安其勢甚蹙明初置衛銓官如宋元故事蓋欲中斷田鎮以伐其謀云

又曰向武宋置州隸橫山寨元隸田州路其界東北抵田州西抵鎮安南抵鎮遠洪武二年詔以黃

志威之子世鐵為知州許世襲二十一年以向武
州叛蠻梗化官軍討平之置守禦千戶所領縣一
曰富勞元置洪武間為蠻獠所據建文時復置仍
隸向武州永樂初省武林入焉土官亦黃氏世襲
廣東瓊州

臣等謹按瓊州自明洪武時已升為府特以其地
多黎岐故明史土司傳標瓊州二字以目之即如
前湖廣四川貴州雲南廣西俱用府州名之意也

元世祖至元十五年以瓊州路屬海北海南道宣慰司
瓊州居環海中漢武帝平南粵始置珠崖儋耳二郡
歷晉隋唐宋叛服不一至是改置瓊州路文宗天曆
二年又改乾寧軍民安撫司

明太祖洪武元年改乾寧安撫司為瓊州府

時征南將軍廖永忠平廣東改為府以崖州吉陽軍
儋州萬安軍俱為州南建州為安定縣隸焉六年儋
州宜倫縣民陳昆六等作亂攻陷州城調兵勦之以

儋萬二州山深地曠詔置守禦千戶所七年儋州黎人符君勝等及海南羅屯等洞黎人澄邁縣賊王官舍亂俱官軍討平之十五年萬崖二州民陳鼎叔等作亂陷陵水縣為海南衛官軍擊敗追至藤橋斬鼎叔等三百餘人餘黨悉平十七年儋州宜倫縣黎民唐那虎等亂海南衛指揮張信發兵討之那虎及其黨鄭銀等敗遁信追禽之送京師知州魏世吉受賄縱銀去帝命遣力士即其州杖世吉責其捕所縱者

成祖永樂三年遣官齋教諭生黎之未附者

瓊州所屬七縣八洞生黎八千五百人崖州抱有等十八村一千餘戶俱已向化惟羅活諸洞生黎尚未歸附命通判劉銘齋教撫諭之又從御史汪俊民言以瓊州周圍皆海中有大小五指黎母等山皆生熟黎人所居比歲軍民有逃入黎洞者甚且引誘生黎侵擾居民屢使招諭未見信從且山水峻惡風氣亦異罹其瘴毒鮮能全活有宜倫縣熟黎峒首王賢佑

嘗奉命招諭黎民歸化者多仍詔賢佑量授以官俾
招諭未服并戒約諸峒無納逋逃其熟黎則令隨產
納稅悉免差徭其生黎歸化者免稅三年峒首則量
所招民數多寡授以職自是通計前後所撫諸黎共
千六百七十處戶三萬有奇十九年崖州民以私忿
相戰鬪衛將利漁所欲發兵勦之瓊州知州王伯貞
執不可乃遣寧遠縣丞黃童按視果仇殺逮治數人
黎人遂安

宣宗宣德元年澄邁等縣黎作亂命官討之

時澄邁縣黎王觀珠瓊山縣黎王觀政等聚衆殺土知縣流劫鄉村殺掠人畜命廣東三司勘實致討二年指揮王瑀等追捕黎賊兵至金雞嶺賊率衆拒敵敗之生禽賊首王觀政及從賊二百六十二人斬首二百六十七級餘衆潰奔走入山招撫復業黎八百一十二戶以捷聞械送觀政等至京帝謂尚書蹇義曰蠻性雖難馴然至為變必有激宜嚴戒撫黎諸官

寬以馭之若生事激變國有常刑正統九年崖州守
禦千戶陳政聞黎賊出沒領軍搜捕賊乃圍熟黎村
黎首出見政等輒殺之又焚其廬舍殺其妻孥擄其
財物各黎激變政及官軍百人皆為所殺事聞坐副
千戶洪瑜激變律斬景泰三年敕諭萬州土判官王
琥撫諭該管村峒黎人各安生業不得倣倣別峒生
黎所為其官軍亦不得擅入村峒擾害激變天順五
年敕兩廣巡撫葉盛以海南賊五百餘占據城池可馳

至瓊相機撫捕勿使滋蔓

孝宗弘治十五年黎賊符南蛇反鎮兵討之

時戶部主事馮顥奏府治在大海南有五指山峒黎人雜居外有三州十縣一衛十一所永樂間置土官州縣以統之黎民安堵如故成化間黎人作亂三度征討將領貪功殺戮無辜迨知府張桓余濬貪殘苛斂大失黎心釀成今日南蛇之禍臣本土人頗知時勢乞仍考原設應襲土官子舍使集土兵可得數萬

聽鎮巡官節制有能禽首惡符南蛇者復其祖職以
蠻攻蠻不數月可奏績矣詔從之

世宗嘉靖十九年崖萬二州黎岐叛

總督蔡經以二州黎岐叛亂攻逼城邑請設叅將一
員駐劄瓊州分守二十八年崖州賊首那燕等聚衆
四千人為亂詔發兩廣官軍九千勦之給事鄭廷鵠
條陳三事下部議行之二十九年總兵官陳圭總督
歐陽必進等將兵進勦斬賊五千三百八十級俘一

千四十九人奪牛羊器械倍之招撫三百七十六人捷聞帝嘉其功賜圭必進祿米廩襲有差

鄭廷鵠奏畧曰瓊州諸黎盤居山峒而州縣反環其外其地彼高而我下其土彼膏腴而我鹹鹵其勢彼聚而我散故自開郡來千六百餘年無歲不遭黎害然無如今日甚矣今日黎患非九千兵可辦必添調狼土官兵兼召募打手集數萬衆一鼓而四面攻之然後可克嘗考勦除黎患其大舉有

二元至元辛卯曾空其穴勒石五指山其時雖建
屯田府立定安會同二縣惜其經畧未盡故所得
旋失嘉靖庚子又嘗大渡師徒攻毀巢岡無處不
至於是議者謂德霞地勢平行擬建城立邑招新
民耕守業已舉行中道而廢旋為賊資以至復有
今日謹條三事一崖黎三面郡縣惟東南連郎溫
脚二峒岐賊實當萬州陵水之衝崖賊被攻必借
二峒東江以分我兵勢計須先分奇兵攻二峒而

以大兵徑擣崖賊彼此自救不暇莫能相顧則殲滅可期傳聞賊首那燕已入凡陽構集歧賊此必多方誤我且訛言搖惑以堅諸部助逆之心宜開示慰安以解狐疑之黨一隋唐郡縣輿圖可考今多陷入黎中蕩平後悉宜恢復并以德霞千家羅活等膏腴之地盡還州縣設立屯田且耕且守仍由羅活磨斬開路以達安定由德霞沿溪水以達昌化道路四達井邑相望非徒懾奸銷萌而王路

益開拓矣一軍威既振宜建叅將府於德霞各州
縣許以便宜行事以鎮安人心其新附之民中有
異志者或遷之海北地方屯田或編入附近衛所
戎籍如漢徙潯山蠻故事又擇仁明慈惠之長久
任而安輯之則瓊人受萬世利矣疏下兵部議詔
悉允行

神宗萬厯十四年長田峒黎出掠官軍平之

時兵備道既遣兵執戮之草子坡諸黎召衆來報復

戰於長沙營斬黎首四百級於是黃村田尾諸峒黎
皆出降

明史土司傳曰瓊州黎人居五指山中者為生黎
不與州人交其外熟黎雜耕州地原姓黎後多姓
王及符熟黎之產半為湖廣福建奸民亡命及南
恩藤梧高化之征夫利其土占居之各稱酋首成
化間副使涂棐設計犁掃漸就編差弘治間符南
蛇之亂連郡震驚其小醜侵突無時而息云

西南夷附錄

臣等謹按王圻續通考明成祖永樂七年及宣宗宣德六年皆遣太監鄭和往諭諸蕃故將受詔諸國入職方者附錄於後今仍之如左

龍牙犀角

地內平而外尖民皆蟻附而居之氣候常熱以親戚尊長為重一日不見則持酒肴問安地產沈速降香等

龍涎嶼

嶼浮海內波擊雲騰每至春間羣龍來集交戲遺涎番人乃駕獨木舟登嶼採歸設遇風波則人俱下海旋即至岸其涎初若脂膠黑色有魚腥氣久則成大塊或大魚腹中割出亦覺腥氣迨焚之其香清遠貸於蘇門官秤一斤金錢一百九十二准中國銅錢四萬九千文

龍牙門

在三佛齊之西北山門相對若龍角狀中通船山
塗田瘠氣候常熱四五月間淫雨以擄掠為豪遇
有番船則駕小舟迎敵若得順風則倖脫否則被
其截刼泛海者宜慎焉

吉里地悶

地在連迦羅之東滿山茂林皆檀香樹無別種商
販聚十二所有酋長田肥穀茂朝熱暮寒商船染
病十死八九蓋其地多瘴氣也

假里馬丁

地與交攔山相望海洋中氣候常熱俗甚囂薄雖有溪田米穀少收惟種芭蕉採其實以為食

麻逸凍

地在交攔山之西南洋海中山峻地平氣候稍熱田禾倍收國尚節義婦人喪夫則削髮髻面絕食七日多有並逝者得甦亦不再嫁至焚夫日類自赴火死

臣等謹按王圻續通考不載土司故以上諸處皆載於海洋後今附此以便觀覽



欽定續文獻通考卷二百四十六